



PAULI APOSTOLI VITA, IN QUA POTISSIMUM

Describuntur ejus Patria, Mansiones, Itinera, Peregrinationes,
& Navigationes per Asiam & Europam, & à Ierosolyma Romam usque.

E X

NOVO TESTAMENTO.

Saulus è Iudæorum gente ortus.

- I. **E**go Israëlita sum, ex semine Abraham, de Tribu Benjamin Paul. de se in Ep. ad Rom. c. 11. vers. 1. Circumcisus octavo die, ex genere Israël, de Tribu Benjamin, Hebræus ex Hebræis: idem ad Philip. c. 3. vers. 5.

Saulus in Tarso Ciliciæ natus est.

- II. Ego sum vir Iudæus, natus in Tarso Ciliciæ. Paul. de se Act. Ap. c. 22. vers. 3. & dixerat paulo ante: Ego homo quidem sum Iudæus, è Tarso Ciliciæ, non ignotæ civitatis municips. Act. Ap. c. 21. vers. 39.

Saulus civis Romanus.

- III. Saulus à Tribuno (Lyfia) iussus cædi, & torqueri: petiit an liceret civem Romanum indemnatum flagellare: cum ergo Paulum civem Romanum esse audisset Tribunus, dixit Paulo: Hanc civitatem multâ summâ se consecutum fuisse, sed Paulus dicit se natum esse. Act. c. 22. vers. 24... 28.

Paulus Ierosolymis studuit sub Gamaliële.

- IV. Nutritus in ista civitate (Ierusalem) secus pedes Gamaliel, eruditus juxta veritatem paternæ legis: æmulator legis, sicut & vos omnes estis hodie. Act. c. 22. vers. 3. secundum legem Phariseus, secundum æmulationem persequens Ecclesias Dei, secundum justitiam, quæ in lege est, conversatus sine querela. Paul. ad Philip. c. 3. vers. 5. 6.

Saulus erat cum Iudæis in lapidatione Stephani.

- V. Cum Iudæi impetum facerent unanimiter in Stephanum, & ejicerent eum extra civitatem; testes deposuerunt vestimenta sua, secus pedes Sauli: & lapidabant Stephanum invocantem, & dicentem: Domine Iesu suscipe spiritum meum, & positis genibus clamantem: Domine ne statuas illis hoc peccatum: & cum hoc dixisset obdormivit in Domino. Saulus autem erat consentiens neci ejus. Act. c. 7. vers. 56... 59. Et ipsemet de se Paulus: Et cum funderetur sanguis Stephani, ego astabam, & consentiebam, & custodiebam vestimenta interficientium eum. Act. c. 22. vers. 20.

Post martyrium Stephani Discipulos Christi persequitur.

Qui hanc viam (Christi Euangelium) persecutus sum, usque ad mortem: alligans, & tradens in custodias viros & mulieres, sicut Princeps Sacerdotum mihi testimonium reddit, & omnes majores natu: à quibus Epistolas accipiens, Damascum pergebam, ut adducerem inde vinctos in Ierusalem. Paulus de se Act. c. 22. vers. 4. 5. Dictum erat antea: Saulus devastabat Ecclesiam, per domos intrans, & trahens viros, ac mulieres, tradebat in custodiam. Act. c. 8. vers. 3.

Damascum dum pergeret, mirabiliter conversus est.

Saulus adhuc spirans minarum, & cædis in Discipulos Domini: accessit ad Principem Sacerdotum: & petiit ab ipso Epistolas in Damascum, & Synagogas, ut si quos invenisset hujus viæ viros, & mulieres, vinctos perduceret in Ierusalem. Et cum iter faceret, & appropinquaret Damasco, mediâ die circumfulsit eum copiosa lux de cælo; & cadens in terram, audivit vocem dicentem: Saule, Saule, quid me persequeris? Ego sum Iesus Nazarenus, quem tu persequeris. Paulus tremens dixit: Domine, quid me vis facere? Dominus dixit: Surge, & ingredere Damascum, & ibi dicetur tibi de omnibus, quæ te oporteat facere. Surrexit Paulus de terra, & cum non videret, præ claritate luminis illius, ad manum deductus à comitibus venit Damascum, & erat ibi tribus diebus non videns, nec manducans, nec bibens. Ananias autem (cui Dominus apparuerat, dixeratque Saulum ex persecutore vas electionis fore) venit in domum, in qua erat Saulus: & imponens ei manus, dixit: Saule frater, Dominus misit me Iesus, qui apparuit tibi in viâ, qua veniebas, ut videas, & implearis Spiritu Sancto. Deus Patrum nostrorum præordinavit te, ut cognosceres voluntatem ejus, & videres Justum, & audires vocem ex ore ejus: quia eris testis illius ad omnes homines, eorum quæ vidisti, & audisti. Et nunc quid moraris? Exurge, & baptizare. Et confestim ceciderunt ab oculis ejus tamquam Squamæ, & visum recepit,

VI.
A. C. 34.

VII.
Circa An-
num Chr.
34. aut 35.